

近代中國史料叢刊續編第十一輯
沈雲龍主編

蒙
墾
續
供

貽

穀著

文海出版社
有限公司印行

蒙

墾

續

供

協辦大學士尚書鹿傳霖
度支部左侍郎紹英等原查辦摺

奏爲查明墾務大臣被叅各款謹分別輕重據實臚陳並保荐賢員辦理善
後事宜以綏蒙藩而收實效恭摺仰祈

聖鑒事竊臣等欽奉

諭旨查辦蒙旗墾務光緒三十四年二月二十九日行抵歸化城業經恭摺具
報在案查綏遠城將軍墾務大臣貽穀督辦內蒙古東西盟墾政七載於
茲一旦爲副都統文哲琿列款糾叅營私有十餘事之多冒款在數百萬
以上實屬駭人聽聞臣等請

訓時荷蒙

聖諭周詳諄諄以恤蒙藩固人心爲先務臣等竊謂辦理墾務之善不善當以
羣情之向背爲衡款項出入之實不實當以一念之公私爲斷當在京時
檢閱原叅各節除檢帶度支部案卷備查外有宜在烏準兩旗訪詢者有
宜在包頭南站等處考查者有宜在陝西調查者當卽電致陝西撫臣恩

www.docsriver.com 定制及广告服务 小飞鱼
更多**广告合作及防失联联系方式**在电脑端打开链接
<http://www.docsriver.com/shop.php?id=3665>



www.docsriver.com 商家 本本书店
内容不排斥 转载、转发、转卖 行为
但请勿去除文件宣传广告页面

若发现去宣传页面转卖行为，后续广告将以上浮于页面形式添加

www.docsriver.com 定制及广告服务 小飞鱼
更多**广告合作及防失联联系方式**在电脑端打开链接
<http://www.docsriver.com/shop.php?id=3665>



壽檢齊有關河套墾務案卷交前乾州直隸州知州吳廷錫馳送歸化行館備查一面札委吏部主事王憲章馳赴陝西榆林府調閱案卷就近赴烏準杭錦各旗訪查抵歸化後又派度支部主事劉澤熙前赴包頭南站等處採訪輿論並守提包頭公司文書簿籍一面咨會該將軍凡叅案有關之卷宗悉令檢齊咨送以憑查究兩旬以來臣等督同各司員朝夕鈎稽逐款考較並摘傳墾局及綏遠城在事各員面加究詰一一呈遞親供旋據吳廷錫賈陝卷至劉澤熙王憲章亦先後至臣等體察蒙情叅稽輿論窮詰墾員印證陝卷俱已得其要領伏查文哲琿原奏分兩大端一曰愚弄蒙古一曰肆意營私而大旨不外於欺朦取巧四字如謂該大臣用王德呢瑪愚弄烏審貝子報地許給盟長該貝子在行轅借銀五千作謝儀按三分算利蒙衆怨恨衆衆未散一節查烏審報地後至今衆衆抗墾屬實委員詢問借銀作謝一事蒙衆均言此係貝子與將軍密事惟自去冬吳委員常向貝子要借銀云係將軍代墊該旗賠教銀三千兩三分起

息貝子未還原叅有因又云杭錦貝子既因報地叅革盟長該大臣復愚弄梅楞棍布從該旗應得荒價內使銀五萬兩一節查杭錦貝子報効銀三萬伊子報効五千均奏咨有案惟該旗應分荒價銀十一萬二千兩貽穀實扣留六萬八千兩除三萬五千外計多扣三萬三千兩原叅有因又蒙衆將梅楞棍布掘拿意在謀殺洩忿一節據王同春供二十八年蒙衆因合旗報墾貽穀獨賞棍布銀六千兩衆心不服將棍布圍住三十三年九月姚學鏡所管官鹽局將蒙鹽盡歸官賣蒙衆以爲棍布所爲復行圍住兩次皆同春解散原叅有因又云準噶爾台吉與貝子爭地陳四黨羽與王同春爭渠報復該大臣有意釀成一節查該台吉卽丹丕爾此次調閱準旗全卷但有剿辦之案無爭地之事蓋誤殺丹丕爾該副都統亦會行有所避忌故舉其細而遺其大也若王陳互鬪釀命事在貽穀未辦墾以前原叅不實又云察哈爾報銷浮冒銀二十四萬與收支斌儀分潤不妥中央由商民李甲三轉圖一節查察哈爾墾務報銷度支部核准有案收

撥各款均屬相符惟墾局之漁利有數倍於三十四萬者弊在公司而不
在報銷原叅不中肯又云尅扣委員薪水訊據斌儀供稱薪水有定章而
委員有勤惰無功則減有勞則加此則用人者操縱之術至心之公私與
加減之數是否相抵則未易究詰原叅有因又云巧取後套地價如先放
後報其間租價儘數入己查此一項全歸公司原叅尙實又云原收蒙地
以千頃算百頃蒙旗卽得百頃之租達拉特旗尤甚一節查墾局由教堂
贖回達旗四成地二千頃墾員丈放除去沙梁樹石尙短七百餘頃又令
該旗指上地一千頃補之計溢出二三百頃無以千頃算百頃之事原叅
不實又云自設公司以二十七萬股本購買套地可得三四百萬兩此卽
指公司地價而言原叅有因又云擅拆倉廩十二座此有奏案所叅不實
又云擅開藍翎捐每支二十五兩據各協領供此捐係爲城工籌款調閱
翎照則功牌也查功牌無捐納者貽穀捐銀萬餘並無奏案原叅屬實又
云家丁李姓孟姓種馬廠地以圖私利一節臣等派員查得貽穀令李姓

等在哈嚕村設局種地而兼放帳民間借錢先扣五月利息又令舉人通泰販賣煙土上年李姓札飭孟姓始將廠地作爲綏遠城公業又云借名放賑實則仍扣兵餉原奏均實又云牛捐捏銷一節查此案原請六萬照順直賑捐其實減折招徠僅二萬餘兩並無捏銷原奏不實又云擅賣庫存官物查庫存無用刀槍貽穀奏請改鑄農器原奏有因又云販賣油鹽米布據防禦英山供將軍在綏遠城設一官木廠一雜貨店弁兵買棺木食物即從月餉扣還原奏有因又云揀放官缺隨意勒索銀兩據各協領供稱將軍每挑缺卽在揀單上手批出銀若干兩以備置辦槍械原奏有因又云在後套開設晉泰玉字號在歸化開設銀莊皮莊查無確據原奏不實以上各節原奏有虛有實情節有重有輕以大臣創辦大政旣任勞必任怨旣任怨必任謗苟能利

國家而固邊圉則公罪固當曲宥卽常過亦可矜原臣等於蒙盟墾務反復推求竊謂貽穀於此一事有二誤有四罪此無可解免者也一日誤認宗

旨

朝廷開放蒙地乃恤蒙以實邊非攘地以圖利也卽顧名思義乃墾荒非墾熟也而貽穀視爲謀利之道於蒙古報地則多益求多於地戶征租則刻益加刻取游牧之地而墾之而蒙民怨矣奪墾熟之地而賣之而漢民怨矣放地有押荒又有地價種地有歲租有渠租而煙地又有另租地價另租皆無奏案其實六七年來度支部所入者僅押荒銀二十餘萬耳於國帑僅毫末之益而邊民受邱山之累此一誤也一日誤用小人墾務開辦之始局員二百餘人其中豈無君子使貽穀知人善任何至爲衆怨所歸無如宗旨既誤賢者不能虐民取媚且以忠鯁見疏其所任者如姚學鏡則晉之幹員貪而狠者也以五原廳同知兼墾局公司兩總辦斌儀者晉昌私人貽穀信之庸鄙無能不數年而保至道員東路公司及察哈爾銷案皆其一手辦理景禔者躁妄喜事險刻性成貽穀以爲南站公司總辦又如陳光遠岳鍾麟鄭天馥呂繼純林毓杜大抵仰承意指朋比爲奸而

陳四命案主謀殺人之王同春係嚴拿未獲之犯貽穀派爲墾局委員地方官畏不敢捕直至去年終京控事發始據咨稱秘密拿獲已在墾局當差五年矣下至商人李甲三舉人通泰家丁李成斌孟昭發皆假威圖利倚勢作奸其始用小人而不知反爲小人所用其究也遂怙過攘利而不恤此二誤也有此二誤而四罪於是乎成一曰巧設公司光緒二十八年貽穀奏設墾務公司係仿鐵路礦務工藝廠各公司之例查路礦工廠皆平地爲山每一事動需數十百萬

朝廷無此鉅款不得不假借公司若墾務則蒙古獻地於

國家

國家放地於墾戶售田得價價卽帑金計畝征租租皆正課有土此有財不須本而自獲利者也貽穀原奏謂地商包攬之弊概行禁止惟墾局零星散放紛擾實多請於張家口設立公司後又分爲東西兩公司凡入股者核照荒價領地所謂荒價者卽每畝收押荒銀三錢也如公司領地千頃

先繳押荒銀三萬兩卽撥地任其轉售東公司定價上地每畝八錢而公
司非上地不領以千頃計地價坐得八萬一反手間卽賺銀五萬矣而東
西兩公司共領地二萬頃是蒙古報効

朝廷之地價幾全爲公司所蝕況其價更有什伯於八錢者如果公司先繳
押荒然後領地轉售猶爲將本求利及閱東盟墾卷皆收到地價再繳押
荒是真不費一錢而坐致鉅萬矣如謂墾局畏紛擾公司卽不畏紛擾乎
既不准地商包攬公司獨可包攬乎如果墾局與公司各派專員猶可說
也乃西盟總辦爲姚學鏡西公司總辦亦姚學鏡卷查該大臣札稿有墾
局委員悉充公司委員之語何以衆人辦一局之事則畏其繁難一人兼
兩處之差而轉形優裕乎總由墾員視墾務爲利藪若從墾局侵漁旣畏
人言亦無大宗進項乃愆貽穀巧立公司名目先借墊款爲詞使地畝盡
入公司而後羣食其利明明盜竊

國財而人不得議其非該公司旣收官款而入私囊又伴於應分紅利中提

出萬餘金爲報効以飾其貪而示其忠又稱渠工經費借用公司銀二十餘萬兩是目前藩臣納土全爲公司所併吞而後來墾戶交租尙須與公司作償款蒙漢俱受其害而

國家不名一錢此貽穀之罪一也一日匿款不報蒙地既經報墾則銖金尺土俱屬

天家督墾大員何款不應入銷何地不應入告而公司所取之地價浮於押荒者由數倍至數十倍不等皆無奏案可稽臣等調查南站墾戶領地執照二十餘張內僅部照五張餘皆公司小照調閱公司票根又另有將軍執照如薛向清二戶共荒熟地四十畝部照填押荒銀十二兩小照填地價庫平銀三百二十四兩其餘大率類此此等辦法皆景禔一人所爲及傳景禔來案則覆稱告假回籍嗣傳呂繼純黃桂棻到案詰以地價每畝至少若干至多若干據供少者自二兩起多者至三百七十兩止而押荒仍每畝三錢也詰以南站公司先繳押荒銀若干則稱未交押荒但墊出開

辦經費一萬二千兩而已原叅謂南站地價有每畝十二兩十八兩者尙未得攘奪刻剝之實也又訊據王同春供兩次報効地一萬五千餘頃內有水渠四道已墾者約七八百頃此名永租地不在蒙旗報地之數亦不在墾局所放一萬六千頃之數每年每頃交蒙人租銀五兩除蒙租外實可獲利銀二萬餘兩等語質之姚學鏡據供地隨渠交渠歸公司修故地亦爲公司有查貽穀收地至一萬六千頃之廣歲入至三萬餘金之多並不

上聞卽任公司專利自三十一年起計得租銀六七萬兩不知王同春所謂報効者報効

朝廷乎抑報効公司乎貽穀之督墾爲

朝廷乎抑爲公司乎又據姚學鏡供察哈爾墾局公司久經奏撤去年該將軍因從前丈放從寬墾戶地多溢出因又派員重丈一次以期覈實等語夫旣重丈農田自必重收地價事無奏案欸屬何人計其欺隱之財殆難

更僕以數此貽穀之罪二也一日朦放站地

朝廷憐蒙人之放棄其地也於是有督辦墾務之

命意在開荒備邊代各盟經營生計而貽穀不喻此意既以威脅利誘併蒙人
荒熟之地而收之乃侵尋而及於站地及爲將軍又侵尋而及土默特地
妄稱與蒙地事同一律而不知毫釐千里也查站地所以養站兵兵不自
耕乃招墾取租以自養土默特自

聖祖仁皇帝征服以後留一公爵而不預札薩克事別以都統治之每兵一名給

地五頃兵亦不自耕仍招墾收租以自養二百年來土站各兵之地田多
換佃戶盡承糧又土性磽瘠迥非杭特兩旗上腴可比墾者多乾隆間舊
戶既完正賦又出徭錢一旦迫令熟地一畝交地價一兩二錢荒地交荒
價八錢民窮無力怨讟繁興和薩兩廳朝夕催科疲於敲扑其具有天良
者則稟求交卸而仰承意指如郝敬端喬樾蔭者則極力追呼此原案所
指和薩聚衆之所由來也驛傳司員奎顯初受貽穀之愚盡站地而報之

貽穀假以總辦之名月給百金既而各章蓋昆都及站兵等人人枵腹乃稟求津貼貽穀飭站地局借給十三站官兵等三百六十金仍俟將來籌定經費時扣還又以每畝一兩二錢之地價爲不足乃由旱地而放及園圃由園圃而放及房基由房基而放及廬舍鋪面卷查上年八月該將軍札和林廳云三站民戶異常刁狡自新店阻墾以後和林本街已經丈放之地亦復希圖翻異云云查從來放荒未有放及街道者主稿之景禔竟昌言不諱實所希聞札文又云房屋華美者租價必多繳價稍重亦不過如預支數年租價而已此等辦法直使民間自行修建之屋又自行購買一次是一屋而再造也臣等前在甯遠行次有和林地戶百餘人環跪乞恩查來者不皆良善之人而控者亦實有倒懸之勢此貽穀之罪三也一日誤殺台吉蒙古報墾本非蒙人所願故王公貝子報地而其下往往怨咨奪我祁連山六畜不蕃息自古然矣墾局委員又貪得無厭以致蒙人視局如阡塹而墾員亦視蒙若寇讎光緒三十一年五月準旗分局委員

岳鍾麟稟稱蒙民們肯吉亞聚衆搶局並無台吉丹丕爾之名六月朔包局總辦姚學鏡轉據岳鍾麟稟稱們肯吉亞仍盤踞老巢皆由丹丕爾主使並謂蒙人皆當寸磔於是以丹丕爾爲首逆經貽穀具奏請勦而電傳諭旨仍有勿得操切之戒而墾員恨其戇必欲用兵以示威帶兵官涎其財又欲邀功而列保張大其詞幾同巨寇蓋丹丕爾年老小康而性戇者也十月十三日參將譚湧發副將胡泰才委員林毓杜楊守性等夤夜往捕丹丕爾開槍抗拒兵隊卽縱火焚燒斃其家屬五人而丹丕爾人亡財盡父子潛逃按之陝西神木縣勘驗稟詞其子婦塔木幾所供實無叛逆情形果爲叛逆該旗豈敢報案請驗神木知縣又豈能錄供通稟乎及丹丕爾就獲文武員弁所稟幾於兇悖無倫而始終集衆自衛者不過數十人耳案交歸化廳同知樊恩慶審訊恩慶知其冤不忍鍛鍊爲呂繼純所揭乃別委姚學鏡余寶滋承審而獄詞果具在墾員以爲戮此一人則蒙旗破膽永無抗墾之虞而不知三字獄成兩盟心痛益播墾局之惡聲也論者

謂丹丕爾誠有罪然罪不至死姚學鏡爲岳鍾麟所蔽貽穀又爲姚學鏡所蔽旣請勦辦於先不得不一錯到底而丹丕爾白頭就戮矣此貽穀之罪四也以上所陳蒙盟大局幾爲貽穀所誤貽穀實爲羣小所誤羣小之厚官謗拂民心又皆爲一利字所誤向非文哲瑋訐奏後患正復無窮然該副都統之奏叅實貽穀逼迫使然非眞爲

國而爲民也原叅所指補修軍需餘銀三千兩久經入己一節與貽穀所叅二十六年補修軍械銀八千兩僅實用七百餘兩同是一事餘欸無著則彼此指爲侵吞帳據無存則彼此詆爲燬匿調閱案卷僅有協領景秀呈出帳目一本及領字十九張該副都統親筆信函兩紙傳訊景秀及庫書吉存湍奇先防禦呢瑪山等均不能指實查閱文哲瑋兩函一致貽穀有顧全新事四字一致文案處陳光遠有前請代呈册稟之語臣等叅詳此事文哲瑋謂貽穀入己實屬虛誣而貽穀專罪文哲瑋一人亦非公論蓋此項餘銀寄庫直視同閒款開支必非一人所蝕檢閱領字共領銀二千

餘兩皆云以備支用內有送前署將軍程儀百兩亦取諸此彼時左司十餘人榮昌居首文哲輝次之誠恐辦公者事事侵挪而在事者人人染指貽穀二十八年冬到任直至去年催辦報銷始行查問則未見此款可知矣文哲輝果未分潤何爲必欲顧全而且代造銷冊應交後任將軍查明分別究追核辦塔爾巴哈台參贊大臣榮昌應否解任來綏備質出自

聖裁總之庫款絲毫爲重必應究明然較諸墾務公司之橫吞鉅款者則有竊國竊餉之判是此一事於正案爲旁支於侵款爲少數矣臣等竊查兩盟墾務以公司爲藏身之固以渠工爲報銷之題以官錢局爲轉運之樞而總以

國家土地販賣得財爲羣小經商之本其實西公司二十八萬之股本皆公款也何得捏名巧取借墊二十餘萬之渠費亦公款也何得公家認還應請革去公司名目一切放地收款修渠事宜全歸墾務局辦理其已放未收之地價及王同春報効渠地之歲租由接辦墾務者查明一併列入正

款報部候提至東盟墾務早經奏結而又重丈重征臣等就近劄飭甯遠
廳同知丁英年查復據稱該廳屬重收地價一萬餘兩推之張獨多各廳
不知收銀凡幾公司已撤誰則得之亦應查究明確追繳入官至其丈放
站地及土默特地以房基一畝而有取至三百七十兩者可謂至酷奇貪
此地本有賦役與蒙古報地懸殊應請酌提站地歲租津貼站員兵丁土
默特地從此不再丈放未收之地價概予豁除其已收之地價四萬二千
二百餘兩若逐戶發還又恐吏役中飽應卽存庫候撥凡領照者無論房
基地畝均准作爲己業以廣

皇仁至墾局各員凡貽穀倚任最深者則蒙漢之詬厲亦愈甚山東候補道斌
儀奏欽附益婪款不貲雲南候補直隸州知州景禔苛暴險詖商農共憤
署東勝廳同知岳鍾麟讎蒙誣叛幾壞邊局山西候補知縣吳逮葵以兵
壓民形同寇盜分省補用府經歷誌良逼追地價慘用非刑應請一併革
職發往新疆効力贖罪五原廳同知姚學鏡心貪手辣率定爰書候補參

將譚湧發虛報冒功縱兵擄物應請一併革職發往軍台効力贖罪分省
補用知府陳光遠直隸州知州黃桂棻山西候補直隸州知州呂繼純同
知郝敬端余寶滋知縣鄭天馥林毓杜喬樾蔭通泰皆驕詔互用迎合殃
民應請一併革職各該譴員應俟接辦墾務大臣查明款項交代清楚再
予分別戍邊回籍王同春已入園扉雖傾產歸公不足抵殺人之罪應就
所犯本案歸地方官辦理李甲三卽李先春特與軍屬往來面辱官長署
歸化廳同知張嘉楨因之去任應交歸綏道傳案責飭遞籍管束家丁孟
昭發積惡多端聞風逃匿應勒令貽穀交出發邊充軍墾務敗壞至此而
歷年保獎勞績冒軍功文武各員屢邀奏保何以服人相應請
旨飭下吏部陸軍部將貽穀歷年保案一併撤銷以快人心而彰公道文哲瑋
向亦阿附貽穀土默特地是其專轄而聽苛斂丹丕爾之獄又隨同畫諾
此次因侵款之事恐貽穀奏參乃爲先發之計似亦咎有應得惟貽穀文
哲瑋均係一二品大員應如何分別懲處之處伏候

聖裁夫以兩盟墾務承羣小以酷濟貪之後必有善其後者始能挽邊局而靖人心然矯小人之弊而遂盡反所爲則又不可臣等籌商善後事宜舉其大略厥有五端一曰服蒙心蒙古既報地於前何又抗墾於後由貽穀旣收其地復分其租謬持蒙人宜弱不宜強之說絕不謀其教養之事除王公貝子偶邀

褒寵外扎薩克以下皆重有所失而一無所得蒙情安得不怨今後凡蒙地所出之財宜盡以備蒙古之用

朝廷放墾之意誠以烏塔逼近北鄰內蒙古富則可以濟其餉強則可以濟其師豈利此區區二十萬金哉惟興蒙學練蒙兵均非沙漠穹廬所能驟辦當先於歸綏立文武學堂各一所選蒙人秀特子弟而教之俾學成轉相傳習以地價及三成歲租充爲經費此強蒙之基也貽穀用一王德呢瑪而烏審至今抗墾賞一梅楞棍布而杭錦至今不服後來者當重懲二奸以舒積忿果能如上所言而蒙人不傾心內向者未之有也二曰查款

目臣等請查墾局及公司帳簿寧經抽改出入多不相符查東西兩盟共放地五萬餘頃以每畝八錢計當得地價四百餘萬兩而六七年來地價未入奏銷簿籍又無確數

朝廷僅入押荒銀二十萬兩又撥解直隸山西等處銀三十五萬餘兩即使渠工除五十餘萬歷年墾局經費再除四十餘萬分給蒙古除二十餘萬已放未收者再除二十餘萬猶應有二百餘萬而西公司反云虧銀十萬有奇及傳東公司總辦斌儀詢以該公司所提公積花紅各五萬兩何在則稱公積尙存花紅已散然亦未見分金之據也況王同春報地之歲租左右兩翼重收之地價南站放地六七千頃房屋鋪面暴斂橫征而云僅收銀四萬餘兩亦恐不實況渠工浮冒路人所知河套未放之地年年取租租銀安在皆應實力清查追還

天府否則貪人重爲民害而仍坐擁厚資亦非情法之平也三日清地租達拉特教案賠款我以十七萬兩贖回四成地及四成補地二千餘頃應爲我

自有之地西盟七旗報効放墾者凡一萬六千餘頃曰分租地亦當爲我有者也王同春所報之一萬五千頃曰永租地我種則認蒙租不種則還爲蒙地也今當分別清釐我贖回之地應照內地賦則按畝升科分租地定有等則應仍其舊永租亦仍王同春之舊每頃交蒙租五兩我可收二十兩有餘惟各地有已放未放之別未放之地又有荒熟之別荒地未放者亟宜招墾荒價及繩丈從寬則丈放必易熟地未放則蒙人先已共給漢民後乃報諸墾局卽欲多收地價亦應先儘原佃承耕而墾員貪利恃強必盡逐原佃而轉賣之以圖厚利遂致蒙漢交憤聚衆抗官丹丕爾之獄由此烏審全旗至今聚衆抗墾亦由此墾員自知奪地之非佯指黑界惡地與之以荒易熟民不肯遷又設分年閉地之法未遷則征原佃之租俟其既遷坐得上腴之價今當酌除閉地遷民之令其地向爲誰種卽令其人繳價納租一反掌而民心定矣分租地蒙七我三永租地如王同春言似是蒙三民七墾局租章歲以全租交局再由局給蒙不免尅扣剝蝕

之弊應飭各墾戶每年納租時卽按向章數目分別交蒙交官以歸簡易
又查沿渠腴地均爲貽穀親朋及墾員等佔領人多不平應一併入官另
行文放取價不惟蒙漢悅服亦天理國法所應爾也四曰籌推廣伊盟七
旗所報之地特十分之一耳其沿河千里廣漠無垠渠至何處卽墾至何
處無盡藏者也西公司借渠工銷納數十萬金而王同春所報四渠未增
尺寸足見修渠經費半屬掙銷今當少減歲租而加渠租卽儘渠租而充
渠費渠增則地增地增則租增久久不息可冀斥鹵皆爲膏腴而歲入滋
多邊餉有賴耕農羣集荒漠成村禦強鄰設行省皆基於此此蒙藩之福
亦

國家萬世之利也又據姚學鏡面陳特旗賠教之款本三十七萬全以土地
爲質除我已贖回外教堂仍留地數千頃須三十萬取贖頃年教士招墾
取租民多赴之及此不贖異日墾地多而獲利厚將無取贖之期此則望
諸接辦墾務者早籌的款取贖若能令公司吐其所食十之一二立可珠

還

朝廷有獻琛益地之祥藩屬消厝火積薪之患誠當務之爲急也五日謀交
通墾員敢於放利歛怨者特其僻在塞外不能呼吸通

帝座耳今當接修歸太電綫俾省會之氣通再籌修綏張鐵路直達京師俾朝
天之路捷鐵路附於同太公司之內由山西紳富集捐電綫所費較廉卽由晉
庫籌撥先行開辦如鐵路成不儘

朝覲訟獄之便也商貨往來交易百產滋豐蒙古鹽鹺皮革之利將遍天下
歸城稅務亦當百倍於前將見原隰龍鱗市廛櫛比晉邊頓實蒙礦爭開
萬里冰天立有雨集雲興之勢此又當務之爲急也凡此五端應俟接辦
墾務大臣揆度情形斟酌損益再行

奏明辦理要之得人則治不得人則仍屬空言溯查墾務初開督墾大臣與
綏遠將軍本各自爲政嗣貽穀就緒軍符墾旗始合而爲一向使有互相
糾查之人或者專斷誤邊不至如是之甚今宜仍分兩事龍河重鎮請別

簡廉幹公正之軍臣專司旗務而以督墾大臣專辦兩盟善後事宜惟轉敗爲功非得精明慈惠豐財和衆之員不勝此任查現任山西布政使丁寶銓公忠亮直心細才長若使接辦墾務厥有五便如貽穀去任更替宜速寶銓卽由晉藩赴歸綏便一墾員貪劣者多一經撤換則接替需人寶銓以晉藩用晉吏知之有素調遣亦靈便二公司墾局侵欺漏匿款目紛繁綜覈追交芴絲待理寶銓清剛明練人不能欺便三恤蒙安民亦不聽烏審終抗贖田闢土而不使民教相爭寶銓惠而有威必能蕝事便四鐵路股捐最難招集寶銓從福公司之手奪回晉礦權利晉人感戴決髓淪肌就地籌捐則綏張鐵路其成必速便五臣等公同商酌保其必能勝任如蒙俞允卽請以山西布政使丁寶銓接充墾務大臣更擬仰懇

天恩

賞加理藩部侍郎銜使全蒙歸其制馭實於邊局有裨所有查明貽穀被叅各款並保賢員接辦墾務各緣由謹具摺由驛五百里馳陳臣等於拜摺後

卽行起程仍由太原回京前刊查辦事件關防一顆俟抵京覆
命後卽送禮部查銷合併陳明伏乞

皇太后

皇上聖鑒訓示謹

奏光緒三十四年四月初二日奉

硃批另有旨欽此

謹將東西全墾各局暨公司收發各款彙總開單呈請

鑒覈

計開

東墾各局收款

一左翼共押荒地壹萬捌千柒百捌拾陸頃肆拾陸畝壹釐陸毫每畝叁錢

共收過押荒庫平銀伍拾陸萬叁千伍百玖拾叁兩捌錢肆釐捌毫册內

多二分

詳於收支處造送左翼局二十八年至三十一年造銷征收押荒清册押荒新收項下一款四分經費新收項下第一款至第三款

六分經費新收項下第一款至第三款又收支處造送左翼局三十二年

至三十三年續征押荒清册押荒新收項下一款四分經費新收項下

款六分經費新收項下一款以上三款均將睿王牧廠押荒經費清册新收項下

一左翼補收舊押荒局尾欠經費庫平銀叁千伍拾伍兩貳錢肆釐壹毫册

內無二錢

詳於收支處造送左翼局收發舊案押荒每兩清册新收項下第二款

一收左翼旗缺地六分經費庫平銀柒千玖百伍拾兩

詳於收支處造送左翼局已經造銷押荒

經費各款交代清冊六
分經費項下第四款

一 豐鎮共押荒地玖千貳百柒拾肆頃壹畝玖分貳釐每畝叁錢共收過押

荒庫平銀貳拾柒萬捌千貳百貳拾兩伍錢柒分陸釐

詳於豐鎮局已經報銷押荒經費交

代冊新收項下第二款又該局未經報銷押荒經費交代冊新收項下第一款

一 大同馬廠共押荒地壹百陸拾柒頃壹拾肆畝每畝叁錢共收過押荒庫

平銀伍千壹拾肆兩貳錢

詳於豐鎮局已經報銷押荒經費交代冊新收項下第三款又該局未經報銷押荒經費交代

冊新收項下第二款

一 甯遠共押荒地叁千玖百肆拾壹頃柒拾貳畝叁分肆釐貳毫每畝叁錢

共收過押荒庫平銀壹拾壹萬捌千貳百伍拾壹兩柒錢貳釐陸毫

詳於收支

處造銷右翼各局押荒經費各項清冊押荒新收項下第一款又四分經費項下第二款又六分經費項下第二款

一 收甯遠批解淨收押荒庫平銀玖千伍百兩貳錢伍分肆毫

詳於收支處造送未經

銷察哈爾左右翼各局續收押荒經費開支各項清冊新收項下第三款

一 興和共押荒地陸千捌拾壹頃陸分每畝叁錢共收過押荒庫平銀壹拾

捌萬貳千肆百叁拾兩壹錢捌分

詳於興和墾務公所造送征收押荒經費總冊

一陶林共押荒地壹百捌拾陸頃捌拾肆畝每畝叁錢共收過押荒庫平銀

伍千陸百伍兩貳錢

一收陶林長解荒價庫平銀捌百肆兩陸錢捌釐

以上二筆詳於陶林征收押荒交代清摺

一收左右翼召廟地減半押荒庫平銀壹萬叁百捌拾叁兩貳錢捌分伍釐

詳於收支處收發總數交代清冊新收項下第七款第八款第二十款及興和公所造送撥給香火地畝銀兩清冊實在項下第一款

一收牛羊羣報効經費庫平銀叁千柒百捌拾壹兩肆錢捌分貳釐

詳於收支處收

發總數交代清冊新收項下第二十三款

一收甯遠未定章程以前溢收召廟押荒庫平銀叁千貳百肆拾伍兩捌錢

叁分伍釐

詳於收支處收發總數交代清冊新收項下第二十一款

一收右翼蒙員報効歸公庫平銀貳千兩

詳於收支處收發總數交代清冊新收項下第二十四款

一收豐鎮舊地逾限壹成經費庫平銀肆百柒拾貳兩貳錢捌釐玖毫

詳於收支

處收發總數交代清冊新收項下第二十五款

以上共收庫平銀壹百壹拾玖萬肆千叁百捌兩伍錢叁分陸釐捌毫

東墾各局發款

一發解部左右翼押荒庫平銀貳拾柒萬陸千玖百陸拾兩詳於收支處收發總數交代清

冊開除項下第一款又左翼局已經造銷征收押荒經費並開支清冊開除項下第一款至第三款

一發左翼撥解直察押荒庫平銀壹拾肆萬肆千肆百叁拾兩叁錢肆分捌

毫詳於左翼局已經造銷押荒經費並開支清冊開除項下第五款第六款

一發右翼撥解晉綏押荒庫平銀壹拾萬柒千伍百柒拾陸兩陸錢陸分玖

毫陸絲詳於收支處收發總數交代清冊開除項下第四款第五款

一發解晉大同馬廠貳錢押荒庫平銀叁千叁百肆拾貳兩捌錢詳於豐鎮局造送已

局報銷押荒經費交代冊開除項下第七款又詳於豐鎮局造送未經報銷押荒經費交代冊開除項下第二款

一發撫恤俄商庫平銀叁千兩詳於收支處收發總數交代清冊開除項下第三款

一發借給西路公司庫平銀肆萬兩詳於收支處收發總數交代清冊開除項下第十一款

一發借給達旗費安河賠教湘平銀肆千兩合庫平銀叁千捌百叁拾貳兩

詳於收支處收發總數交代清册開除項下第十款

一發左翼局開支員司薪工車馬費並給蒙經費庫平銀壹拾陸萬肆千叁

百叁拾陸兩肆分伍釐貳毫以肆貳申湘平銀壹拾柒萬壹千貳百叁拾

捌兩壹錢伍分玖釐壹毫壹絲肆微詳於收支處造送左翼局二十八年

册四分經費開除項下第一款至第三款六年分經費開除項下共六款又

收支處造送左翼局三十二年三十三年年績征押荒經費清册四分經費開除項下第一款六

一發行轉并右翼豐甯興各局處共開支員司薪工車馬并給蒙經費湘平

銀叁拾壹萬貳千陸百捌拾柒兩玖錢肆分肆釐陸毫壹絲伍微合庫平

銀貳拾玖萬玖千伍百伍拾伍兩伍分玖毫叁絲陸忽捌微又庫平銀柒

千叁百陸拾陸兩壹錢貳分伍釐玖絲陸忽肆微共庫平銀叁拾萬陸千

玖百貳拾壹兩壹錢柒分陸釐叁絲叁忽貳微詳於收支處造送押荒經費開支各款清册開除項

下第六款第七款第十六款又豐鎮局造送未經報銷押荒經費開支各項清册開除項下第七款至第十款又陶林應地價銀兩數目清摺開除

項下第一款又與和墾務公所造送應收銀兩及批解開支清冊開除項下第一款

一發墊借準噶爾旗賠教庫平銀壹萬叁千肆百玖拾伍兩壹錢玖分肆毫

貳忽貳微 詳於收支處收發總數交代清冊新收項下第二十二款及開除項下第二款

一發暫借西盟局經費庫平銀肆千捌百陸拾玖兩捌錢叁分 詳於收支處收發總數交代

代清冊開除項下第九款

一發暫借歸化中學堂經費庫平銀貳千兩 詳於收支處收發總數交代清冊開除項下第十二款

一發行轅公用湘平銀叁萬捌千貳拾陸兩玖錢叁分壹釐柒毫玖絲肆忽

合庫平銀叁萬陸千肆百貳拾玖兩捌錢陸毫伍絲捌忽陸微 詳於收支處收發總

數交代清冊開除項下第三十四款

一發興和廳借支公費庫平銀貳千叁百貳拾兩叁錢叁分叁釐 詳於收支處收發總

數交代清冊開除項下第八款

一發東勝廳借支公費庫平銀壹千兩 詳於收支處收發總數交代清冊開除項下第十三款

一發各局員借支薪津車馬庫平銀壹千肆百玖拾陸兩玖錢貳分貳釐玖